

## ԽԱՄԷԼԷՕՆ

(ԿԵԱՆՔԻ ԴԻՏՈՂՈՒԹԻՒՆՆԵՐԻՑ \*)

Ժամանակակից հասարակութեան մէջ շատ տարածուած են այդ սողունի նման մարդկանց տեսակները....:

Քամէլէօնը, ինչպէս երևի լսել է ընթերցողը, ծառերի և թփերի վրայ ապրող մի տեսակ խլէզ է, որ զարմանալի յատկութիւն ունի.—հանգամանքներին նայած արագօրէն փոխել ոչ միայն իր կաշուի գոյնը, այլ և մարմնի ձևը, աւելի կամ պակաս ուռցնելով նրան:

Քաջութեան և ոյժի նշոյլ անգամ չունենալով այդ արարածները դրսից բաւական ահարկու են... որովհետև գլուխների ոսկորները պատերազմի աստուած Արէսի սաղաւարտի նմանութիւն ունեն, իսկ մէջքերին՝ ատամնաձև ցցուածքներ որ ցաւաման ժամանակ... գուցէ վախեցնեն միամիտներին....:

Ճիւղերի վրայ իր գրաւած դիրքը նա պինդ բռնում է իր ոլորուն պոչով և ունեյիքանման թաթերով: Եւ կամաց-կամաց վեր-վեր է բարձրանում աւելի յարմար տեղեր գրաւելու համար....: Իսկ սրն է գոյութեան կռուի մէջ խամէլէօնի գլխաւոր զէնքը:—Լեզուն: Եթէ չլինէր այդ երկայն, ճկուն լեզուն՝նա սովից կը սատկէր....: Մինչդեռ այդ լեզուի շնորհիւ նա բռնում է այն բոլոր դիւրահաւատ և կարճամիտ ճանճերին ու միջատներին, որոնք նստում են նրա շուրջը: Իսկ միամիտ և դիւրահաւատ միջատների թիւն որքան շատ է...: Եւ այդպիսով խամէլէօնը իր երկար ու լպրծուն լեզուի, ինչպէս

\*) Տես «Մուրճ»-ի անցեալ համարը:

և գոյնը փոփոխելու յատկութեան շնորհիւ շատ յաջող կարիւրա է անում բնութեան մէջ: Միթէ նոյն առաւելութիւններն չեն պահանջում մարդկային հասարակութիւնների մէջ... «կարիեր անելու» համար...:

Կենդանաբանները ասում են թէ խամէլէօնների քառասուն և երկու առանձնատեսակութիւններ կան, սակայն ամենատարածուածը վուլգար մականունը կրող խամէլէօններն են: Այդ «վուլգար» տեսակից կան Եւրոպայում, Փոքր Ասիայում և կից երկրներում... Կովկասի մասին գիտունները լուծթիւն են պահպանում, սակայն ես կարող եմ երգուել որ մեզանում չափազանց շատ են «վուլգար» տեսակի... մարդ-խամէլէօնները...:

Եւ ի՞նչ նպաստաւոր պայմաններ դրանց զարգացման համար մեր կեանքում, դիւրահաւատ և կարճամիտ մարդուկ-միջատների հօտեր կամ խաւար ամբոխ և յարմար դիրքեր գրաւելու համար տնտեսական-հասարակական-պետական ծառերի ու թփերի բազմաթիւ ճիւղեր՝ պաշտօններ, դիրքեր...: Բարձրացիր ճիւղերից մէկի վրայ, պոչովդ ու թաթերովդ պինդ ամրացիր տեղումդ, և, հանգամանքներին նայած, արագօրէն փոփոխիր գոյնդ, փքուն կամ նուաստ ձև ստացիր ու գործիր, գործիր անդադար երկայն, ճկուն ու լարժուն լեզուովդ. սարդեր, իշաճանճեր, մեղուններ, պսպղուն բզէզներ, հացալիւիսներ, հարսուկներ և այլն և այլն՝ բոլորը զոհ կը դառնան այդպիսի լեզուին... Եւ կեանքի մէջ յաջողութիւնդ կատարեալ է, ո՛վ առիւծանման խլէզ...

Սէլէն